


津逮秘書

畫史
宣和畫譜

庫	文	閣	內
三 七 一 兩	三 一 六 冊	漢 書	
五 架	八 冊		



第七集 六

內閣文庫	
番號	漢 3160
冊數	178(81)
函號	371 2



画史

宋襄陽米芾元章撰

明海虞毛晉子晉訂

杜甫詩謂辭少保惜哉功名迂但見書画傳甫老
儒汲汲於功名豈不知固有時命殆是平生寂寥
所慕嗟乎五王之功業尋爲女子笑而少保之筆
精墨妙摹印亦廣石泐則重刻絹破則重補又假
以行者何可數也然則才子鑿士寶鈿瑞錦纈襲

數十以爲珍玩回視五王之煒煒皆糠粃埃壒奚
足道哉雖孺子知其不逮少保遠甚明白余故題
所得蘇氏辭稷二鶴云遼海未稀顧蠖蟻仰霄孤
唳畱清耳從容雅步在庭除浩蕩閒心存萬里桀
軒未失入佳談寫真不妄傳詩史好事心靈自不
凡臭穢功名皆一戲武功中令應天人束髮寮陽
侍帝晨連城照乘不保寶黃圖孔誥悉珍真百齡
生我欲公起九原蕭蕭松蕤蕤得公遺物非不多

賞物懷賢心不已其後以帖易與蔣長源字仲永
吾書画友也余平生嗜此老矣此外無足爲者嘗
作詩云斐几延毛子明窗館墨卿功名皆一戲未
覺負平生九原不可作漫呼杜老曰杜二醜汝一
卮酒愧汝在不能從我遊也故敘平生所覩以示
子孫題曰画史識者爲予增廣耳目也

晉画

顧愷之維摩天女飛仙在余家

女史箴橫卷在劉有方家已上筆彩生動髭髮秀潤太宗實錄載購得顧筆一卷今士人家收得唐摹顧筆列女圖至刻板作扇皆是三寸餘人物與劉氏女史箴一同

吾家維摩天女長二尺名畫記所謂小身維摩也戴逵觀音在余家天男相無髭皆貼金

六朝畫

蘇氏古賢像十人一卷衣紋自非晉筆

蔣長源字仲永收宣王姜后免冠諫圖宣王白帽此六朝冠也

王戎象元在余家易李邕帖與呂端問已上皆假顧凱之筆元以懷素帖易于王詵字晉卿家

梁武帝翻經象在宗室仲忽處亦假顧筆

天帝釋象在蘇泌家皆張僧繇筆也張筆天女宮女面短而豔顧乃深靚爲天人相武帝作居士服反脣露齒宮女四人擎花後四武士持戈劔髮如

神也

余家收英布象類六朝時石刻

唐画

五代國朝附

唐初画高鳳并梁鴻故事橫卷在蔡堪字道勝家

唐太宗步輦圖有李德裕題跋人後脚差是閻令

画真筆今在宗室仲爰君發家

道德經一卷出相間不知何人画絹本字大小不

勻真褚遂良書在范相堯夫家與馮京當世家西

昇經不同雖有裴度柳公權跋非閻令画褚筆唐

人自不鑿爾

蘇氏種瓜圖絕画故事蜀人多作此等画工甚非

嚴立本筆立本画皆著色而細銷銀作月色布地

今人收得便謂之李將軍忠訓皆非也江南李主

多有之以內合同印集賢院印印之蓋收遠物或

是珍貢

王維画小輞川摹本筆細在長安李氏人物好此

定是真若比世俗所謂王維全不類或傳宜興楊氏本上摹得

張修字誠之少卿家有辟支佛下画王維仙桃巾黃服合掌頂禮乃是自寫真與世所傳關中十大弟子真法相似是真筆世俗以蜀中画驟綱圖劍門關圖爲王維甚衆又多以江南人所画雪圖命爲王維但見筆清秀者卽命之如蘇之純家所收魏武讀碑圖亦命之維李冠卿家小卷亦命之維與讀碑圖一同今在余家長安李氏雪圖與孫載道字積中家雪圖一同命之爲王維也其他貴侯家不可勝數諒非如是之衆也

文彥博太師小輞川拆下唐跋自連真還李氏一日同出坐客皆言太師者真唐張彥遠名画記云類道子又云雲峯石色絕迹天機筆思縱橫參於造化孫氏圖僅有之餘未見此趣

蘇軾子瞻家收吳道子画佛及侍者誌公十餘人

破碎甚而當面一手精彩動人點不加墨口淺深
暈成故最如活

王防字元規家二天王皆是吳之入神画行筆磊
落揮霍如蓴菜條圓潤折算方圓凹凸裝色如新
與子瞻者一同

李公麟字伯時家天王雖佳細弱無氣格乃其弟
子輩作貴侯家所收率皆此類也

宗室令穰字大年處天蓬亦真吳筆

周穉字仁熟家大悲亦真今人得佛則命爲吳未
見真者唐人以吳集大成面爲格式故多似尤難
鑒定余白首止見四軸真筆也

世俗見馬卽命爲曹韓韋見牛卽命爲韓滉戴嵩
甚可笑唐名手衆未易定惟薛道祖紹彭家九馬
圖合杜甫詩是真曹筆餘唐人大抵不相遠也又
金陵有唐人韓滉画牛今人皆命爲戴蓋差瘦也
馬佳本所見高公繪字君素二馬一齧草一嘶王

詵家二馬相咬是一本後人分開賣蘇激字志東家三匹王元規家一匹宗室令穰家五匹劉涇字巨濟家三匹皆筆法相似並唐人妙手也劉所收白子母牛王仲修字敏夫家黑牛令穰家黑牛皆命爲戴甚相似貴侯家多不同皆命爲戴不可勝數

張退傅丞相孫德淑叔仁宗畫黑猿上有小御寶旁一印胡蘆王素字畫奇甚

唐畫張志和顏魯公樵青圖在朱長文字伯原家無名人畫甚佳今人以無名命爲有名不可勝數故諺云牛卽戴嵩馬卽韓幹鶴卽杜荀象卽章得也

山水李成只見二本一松石一山水四軸松石皆出盛文肅家今在余齋山水在蘇州寶月大師處秀甚不凡松勁挺枝葉鬱然有陰荆楚小木無冗筆不作龍虵鬼神之狀今世貴侯所收大圖猶如

顏柳書藥牌形貌似爾無自然皆凡俗林木怒張
松幹枯瘦多節小木如柴無生意成身為光祿丞
第進士子祐為諫議大夫孫宥為待制贈成金紫
光祿大夫使其是凡工衣食所仰亦不如是之多
皆俗手假名余欲為無李論

巨然師董源今世多有本嵐氣清潤布景得天真
多巨然少年時多作礮頭老年平淡趣高

劉道士亦江南人與巨然同師巨然畫則僧在主
位劉畫則道士在主位以此為別

董源平淡天真多唐無此品在畢宏上近世神品
格高無與比也峯巒出沒雲霧顯晦不裝巧趣皆
得天真嵐色鬱蒼枝幹勁挺咸有生意溪橋漁浦
洲渚掩映一片江南也

關同人物俗石木出于畢宏有枝無幹
張友正家收古柏一株枝枝如龍虵糾結甚異石
亦皴澀不凡題為韋侯平生收畫後多歸王

大抵牛馬人物一模便似山水摹皆不成山水心匠自得處高也

滕昌祐邊鸞徐熙徐崇嗣花皆如生黃筌惟蓮差勝雖富豔皆俗

李玉山水序希雅黃筌之倫翎毛小筆人收甚衆好事家必五七本不足深論

李瑋公炤自言收李成八幅此特以氣與好事相尚爾

宗室仲忽字周臣收孫可玄筌澤垂釣圖亦不俗然世無可玄筆又收唐道德經一卷人物三寸許皆如吳畫

潤州節推莊鼎字節之青州人收麻紙爾雅圖衣冠人物與蘇氏一同

王球夔玉收西域圖謂之間令画褚遂良書與馮京家同假名耳

蔣長源字永仲家周昉三楊圖馮京當世家橫卷

皆入神

蘇州丁氏五星圖宗室叔盎字伯充家金星一小
幀並真迹也

宗少文一筆畫唐人摹絹本在劉季孫家故蘇太
簡物辭稷鶴在蘇之孟家

北史人物衣冠乘馬甚古亦在蘇之孟家題云曹
將軍也

徐熙大小折枝吾家亦有士人家往往見之翎毛
之倫非雅玩故不錄桃一大枝謂之滿堂春色在
余家

李公麟家展子虔朔方行小人物甚佳韓馬破裂
四足如涉水中皆南唐文房物

宗室仲爰字君發收唐畫陶淵明歸去來其作廬
山有趣不俗

楊崇字之損收唐畫村田踏歌樂上題廣政年入
御府人物亦佳

凡收畫必先收唐希雅徐熙等雪圖巨然或范寬山水圖齊整相對者裝堂遮壁乃於其上旋旋掛名筆絹素大小可相當成對者又漸漸掛無對者蓋古畫大小不齊鋪掛不端正若晉筆須第二重掛唐筆爲襯乃可掛也許道寧不可用模人畫太俗也

余家顧淨名天女長二尺五應名畫記所述之數唐鏤牙軸紫錦裝標李公麟見之賞愛不已親琢白玉牌鼎銘古篆虎頭金粟字皆碾雲鶴以結緣也戴逵觀音亦在余家家山乃逵故宅其女捨宅爲寺寺僧傳得其相天男端靜舉世所覩觀音作天女相者皆不及也名畫記云自漢始有佛至逵始大備也

古畫若得之不脫不須背標若不佳換標一次背一次壞屢更矣深可惜蓋人物精神髮彩花之穠豔蜂蝶只在約略濃淡之間一經背多或失之也

蔡駟子駿家收老子度關山水林石車從關令尹
喜皆奇古老子乃作端正塑像戴翠色蓮華冠手
持碧玉如意此蓋唐爲之祖故不敢画其真容漢
画老子于蜀郡石室有聖人氣象想去古近當是
也

仲爰收巨然半幅橫軸一風雨景一皖公山天柱
峰圖清潤秀拔林路縈回真佳製也

余家董源霧景橫披全幅山骨隱顯林梢出沒意
趣高古

余家所收李成至李冠卿大扇愛之不已爲天下
之冠旣購得之背于真州昭宣使宋用臣自舒州
召還見之太息云慈聖光獻太后於上溫清小次
盡購李成画貼成屏風以上所好至輒玩之因吳
丞相冲卿夫人入朝太皇使引辨真僞成之孫女
也內以四幀爲真拆奉上別購補之敕用臣背于
內東門正與此類因語泫然囑吾愛惜余亦甚珍

之及得盛文肅家松石片幅如紙幹挺可爲隆棟
枝茂凄然生陰作節處不用墨圈下一大點以通
身淡筆空過乃如天成對面皴石圓潤突起至坡
峰落筆與石腳及水中一石相平下用淡墨作水
相準乃是一磧直入水中不若世俗所效直斜落
筆下更無地又無水勢如飛空中使妄評之人以
李成無腳蓋未見真耳劉涇自以李成真筆多於
是出示之乃良久曰此必成師也

唐希雅作林竹韵清楚但不合多作禽鳥又作棘
林間戰筆小竹非善是効其主李重光耳

錦峰白蓮居士又稱鍾峰隱居又稱鍾峰隱者皆
李重光画自題號意是鍾山隱居耳每自画必題
曰鍾隱筆上著內殿圖書之印及押用內合同集
賢院黑印有此印者是典于文房物也

內合同乃其璽唐室皆用內合同爲御印至梁高
祖始用御前之印也錢氏以內院倣之封函曰制

姓名內曰制公某人可某官官上用此印日月用國印

今人絕不畫故事則爲之人又不考古衣冠皆使人發笑古人皆云某圖是故事也蜀人有晉唐餘風國初已前多作之人物不過一指雖乏氣格亦秀整林木皆用重色清潤可喜今絕不復見矣范寬師荆浩浩自稱洪谷子王詵嘗以二畫見送題勾龍爽画因重背入水于左邊石上有洪谷子

荆浩筆字在合綠色抹石之下非後人作也然全不似寬後數年丹徒僧房有一軸山水與浩一同而筆乾不圓于瀑水邊題華原范寬乃是少年所作却以常法較之山頂好作密林自此趨枯老水際作突兀大石自此趨勁硬信荆之弟子也於是以一画易之收以示鑒者

荆浩画畢仲愈將叔處有一軸段緘家有橫披然未見卓然驚人者寬固青于藍又云李成師荆浩

未見一筆相似師關同則葉樹相似

關同真迹見二十本范寬見三十本其徒甚多滕
昌祐邊鸞各見十本丘文播花木見三十本祝夢
松雪竹見五本巨然劉道士各見十本餘董源見
五本李成真見兩本僞見三百本徐熙崇嗣花果
見三十本黃筌居家居實見百本李重光見二十
本僞吳生見三百本

關中小孟人謂之今吳生以壁画筆上絹素一一
如刀劃道子界墨訖則去弟子裝之色蓋本筆再
添而成唯恐失真故齊如劃小孟遂只見壁画不
見其真至於點睛皆用濃墨愈光愈失神彩不活
又画人面耳邊地濶口鼻眼相近武宗元亦然以
吳生画其手多異然本非用意各執一物理自不
同宗元乃爲過海天王二十餘身各各高呈似其
手各作一樣一披之猶一羣打令鬼神不覺大笑
俗以爲工也

李公麟病右手三年余始画以李嘗師吳生終不能去其氣余乃取顧高古不使一筆入吳生又李筆神彩不高余爲目睛面文骨木自是天性非師而能以俟識者唯作古忠賢象也

東丹王胡瓌蕃馬見七八本雖好非齋室清玩余嘗購丁氏蜀人李昇山水一幀細秀而潤上危峰下橋涉中瀑泉松有三十餘株小字題松身曰蜀人李昇以易劉涇古帖劉刮去字題曰李息訓

易與趙叔益今人好僞不好真使人歎息

沈括存中家收周昉五星與丁氏一同以其淨處破碎遂隨筆剪却四邊帖於碧絹上成橫軸使人太息

王鞏字定國收李成雪景六幅清潤今歸林希字子中家又收唐竹圖著色亦好一橫竹比他竹大麓也

余家收唐人麻紙画揚子雲腰下懸一兕觥細轉

條索

蔣永仲收古銅兕觥其形勢骨臚凹凸全備轉旋
條索亦如余家画遂以帖易去以證謂之子雲觥
潤州甘露寺張僧繇四菩薩長四尺一板長八尺
許又陸探微神面黃口角露二向上齒金甲手持
幡下一白獅子神彩驚人殿梁天監中蓋拱明間
有二吳道子行腳僧吾移置行腳僧於淨名齋以
避風雨已上並會昌中廢寺於本道合毀寺處移

來於此寺其殿中置明皇銅像因得不廢元符末
一旦爲火所焚六朝遺物埽地江左更無一晉筆
藏是六朝所書卷末晉王摠持煬帝小字也平江
南鳩集置寺題跋具存李衛公祠手植檜皆焚蕩
寺後重重金碧參差多景樓面山背海爲天下甲
觀五城十二樓不過也所存惟衛公鐵塔米老庵
二間余作詩悼之曰色政重重構春歸戶戶嵐槎
浮龍委骨画失獸遺耽神護衛公塔天畱米老庵

柏梁終厭勝會副越人談

榮咨道字詢之收雪獵圖命爲王維不類張氏辟支佛所画合掌象林本類蜀人筆雪山精好是唐物維則未也

李冠卿少卿收雙幅大折枝一千葉桃一海棠一梨花一大枝上一枝向背五百餘花皆背一枝向面五百餘花皆面命爲徐熙余細閱於一花頭下金書臣崇嗣上進公歎曰平生所好終被弟看破

破除平生念矣今歸李莘老野夫家又收兩幅樓臺甚古上有三十餘宮人唐裝約略行筆髮彩生動又收六幅大龍旁画龍王不知何人筆精彩動人云五郡祈輒雨

易元吉徐熙後一人而已善画草木葉心翎毛如唐徐後無人繼世但以獐猿稱可歎或云画孝嚴殿壁画院人妬其能只令画獐猿竟爲人鳩

趙昌王友之流如無才而善佞士初甚可惡終須

伶而收錄裝堂嫁女亦不棄

王端學關同人物益入俗

元霽傳寫真有神彩

孫知微作星辰多奇異不類人間所傳信異人也
然是逸格造次而成平淡而生動雖清拔筆皆不
圓學者莫及然自有瓌古圓勁之氣画龍有神彩
不俗也楊拙學吳生點睛髭髮有意衣紋差圓尚
爲孫知微逸格所破

武岳學吳有古意子洞清元作佛象羅漢善戰掣
筆作髭髮尤工天人画壁髮彩生動然絹素画以
粉點眼久皆先落使人惜之南岳後殿壁天下奇
筆

江南劉常花氣格清秀有生意固在趙昌王友上
傳古龍如蜈蚣董羽龍如魚

趙叔益家舊有出蟄圖江南画魚蝦相隨山石林
木人物如董源龍不俗佳作也是龍吞珠圖

曹仁熙水今古無及四幅圖內中心一筆長丈餘
自此分去高郵有水壁院

長沙富民收水鳥蘆花六幅圖乃唐人手妄題作
韋偃押字後人題也

古人圖畫無非勸戒今人撰明皇幸興慶圖無非
奢麗吳王避暑圖重樓平閣動人侈心

余嘗與李伯時言分布次第作子敬書練裙圖圖
成乃歸權要竟不復得余又嘗作支許王謝於山

水間行自挂齋室又以山水古今相師少有出塵
格者因信筆作之多烟雲掩映樹石不取細意似
便已知音求者只作三尺橫挂三尺軸惟寶晉齋
中挂雙幅成對長不過三尺標出不及椅所映人
行過肩汗不著更不作大圖無一筆李成關同俗
氣

禮部侍郎燕穆之司封郎宋迪復古直龍圖閣劉
明復皆師李成復古比二公特細秀作松枝而無

向背荆楚細甚秀

大夫蔣長源作著色山水頂似荆浩松身似李成
葉取真松為之如靈鼠尾大有生意石不甚工作
凌霄花纏松亦佳作

嗣濮王宗漢作蘆雁有佳思余題詩曰偃蹇汀眠
雁蕭梢風觸蘆京塵方滿眼速為喚花奴又曰野
趣分茗水風光剪鑑湖塵中不作惡為有鄴公圖
王詵學李成皴法以金碌為之似古今觀音寶陀

山狀作小景亦墨作平遠皆李成法也

宗室令穰大年作小軸清麗雪景類世所收王維
汀渚水鳥有江湖意

蘇軾子瞻作墨竹從地一直起至頂余問何不逐
節分曰竹生時何嘗逐節生運思清拔出於文同
與可自謂與文拈一瓣香以墨深為面淡為背自
與可始也作成林竹甚精子瞻作枯木枝幹虬屈
無端石皴硬亦怪怪奇奇無端如其胸中盤鬱也

吾自湖南從事過黃州初見公酒酣曰君貼此紙壁上觀音紙也卽起作兩枝竹一枯樹一怪石見與後晉卿借去不還

朝議大夫王之才妻南昌縣君李尚書公擇之妹能臨松竹木石画見本卽爲之難卒辨文與可每作竹貺人一朝士張潛迂疎修謹文作紉竹以贈之如是不一又作橫絹丈餘著色偃竹以貺子瞻南昌過黃借得以倣臨之後數年會余真州求詩非自陳不能辯也余曰偃蹇宜如季揮毫已逼翁衛書無曲妙琰惠有遺工乍觀虬如物初披颯有風顧藏唯謹鑰化去或難窮

章友直字伯益善画龜虵以篆笔画亦有意又能以篆笔画棋盤筆筆相似其女並能之

杭僧真慧画山水佛像近世出品惟翎毛墨竹有江南氣象寫大牛大數尺形似虎

艾宣張涇寶覺大師翎毛蘆雁不俗寶覺画一鶴

王安上純甫見以謂薛稷筆取去

印湘見畫卽摹無不亂真

杭士林生作江湖景蘆雁水禽氣格清絕南唐無此畫可並徐熙在艾宣張涇寶覺之右人罕得之大抵畫今時人眼生者卽以古人向上名差配之似者卽以正名差配之好事者與賞鑒之家爲二等賞鑒家謂其篤好遍閱記錄又復心得或自能畫故所收皆精品近世人或有貲力元非酷好意

作標韻至假耳目於人此謂之好事者置錦囊玉軸以爲珍祕開之或笑倒余輒撫案大叫曰慙惶殺人王詵每見余作此語亦常常道後學與曹貫道貫道亦嘗道之每見一可笑必曰米元章道慙惶殺人至書啟間語事每用之大抵近世人所收多可贈此語也

余老矣每求新賞與賞鑑之家博易書畫最多不一一記上多有印記可辨無非奇筆萬金之玩自

付識者擊節不為好事道

鍾離景伯字公序收燕公画一幅題曰禮部侍郎

燕穆之画付女五娘氣格如此

王琪字君玉收王維画堯民鼓腹圖

劉涇巨濟收唐人画脫殼筍如生

錢藻字醇老收張璪松一株下有流水澗松上有

八分詩一首斷句云近溪幽溼處全藉墨烟濃又

有璪答詩在大夫孫載家

古書画皆圓蓋有助于器晉唐皆鳳池研中心如

瓦凹故曰研瓦如以一花頭瓦安三足爾墨稱螺

製必如蛤粉此又明用凹研也一援筆因凹勢鋒

已圓書画安得不圓本朝研始心平如砥一援筆

則扁故字亦扁唐詢字彥猷始作斲心凸研云宜

看墨色每援筆即三角字安得圓哉余稍追復其

樣士人間有用者然稍平草斲背未至於瓦惟至

交一兩人頓悟者用之矣亦世俗不能發藥也

坦然明白易辨者顧陸吳周昉人物滕邊徐唐祝
 花竹翎毛荆李關董范巨然劉道士山水也戴牛
 曹韓馬韋馬亦復難辨蓋相似衆也今人画亦不
 足淡論趙昌王友鐔鬢輩得之可遮壁無不爲少
 程坦崔白侯封馬賁張自芳之流皆能汗壁茶坊
 酒店可與周越仲翼草書同挂不入吾曹議論得
 無名古筆差排猶足爲尙友

端州有陳高祖之後收陳世諸佛帝真白画唐使
 下御史姓韋作記頂幅巾不冠後主作醉舞狀

蘇泌家有巨然山水平淡奇絕

蘇洵字及之家有徐熙四花其家故物

蘇汶字達復有江南暝禽圖徐熙一酸榴余家有
 丁晉公所收甜榴滕中孚元直有徐熙對花果子

四軸

石楊休有吾家唐画韋侯故事六橫幅山水人物
 車馬備具後人題作張萱易李邕帖衆物之一也

并徐熙牡丹海棠兩幅也

余家收古畫最多因好古帖每自一軸加至十幅以易帖大抵一古帖不論贖用及他犀玉璫璃寶玩無慮十軸名畫其上四角皆有余家印記見卽可辨

余家晉唐古帖千軸蓋散一百軸矣今惟絕精只有十軸在在奇書亦續續去矣晉畫必可保蓋緣數晉物命所居爲寶晉齋身到則挂之當世不復有矣書畫不可論價士人難以貨取所以通書畫博易自是雅致今人收一物與性命俱大可笑人生適目之事看久卽厭時易新玩兩適其欲乃是達者

余家最上品書畫用姓名字印審定真迹字印神品字印平生真賞印米芾祕篋印寶晉書印米姓翰墨印鑒定法書之印米姓祕玩之印玉印六枚辛卯米芾米芾之印米芾氏印米芾印米芾元章

印米芾氏已上六枚白字有此印者皆絕品玉印
唯著於書帖其他用米姓清玩之印者皆次品也
無下品者其他字印有百枚雖叅用於上品印也
自畫古賢唯用玉印

馮永功字世勳有日本著色山水南唐亦命爲李
思訓

蘇解浩然處見壽州人摹明皇幸蜀道圖人物甚
小云是李思訓本與宗室仲忽本不同

黃筌畫不足收易摹徐熙畫不可摹

蘇子美黃筌鶴鴿圖只蘇州有三十本更無少異
今院中作屏風畫用筌格稍舊退出更無辨處

王晉卿昔易六幅黃筌風牡丹圖與余後易白戴
牛小幅于才翁子鴻字遠復上有太宗御書戴嵩
牛三字其後浙中所在屏風皆是此牡丹圖更無
辨蓋帖屏風易破故也後牛易懷素絹帖及陸機
衛恒等摹晉帖與數種同歸劉涇又嘗王晉卿以

韓馬照夜白題曰王侍中家物以兩度牒置易顏
書朱巨川告于余劉以硯山一石易馬去及得白
牛始自喜以爲有韓馬戴牛然但少杜荀鶴章得
象耳劉旣作歌云元章好古過人書画驚世起余
作歌云天下愛奇人沒量奇不諛人奇解相奇人
奇物方合璧乞與世間人物樣六朝唐盛始兼得
訪古知名已蕭爽人亡物喪付衰夢注想後來逢
好尚元章心自鑒秋月一路仍行九霄上家時菜

色無斗粟書画奇奇世人望譬如大海沈百寶爾
輩乘風得之浪二王褚陸已天作老顧如來更天
匠其餘緹襲凡幾重但見光明爛垂象珍犀瑞錦
扶蘭茝龍躍鸞驚訶翹翹金仙詎敢觸以手雪子
玉人聊置掌余家僻素最沈著退舍還師覺難旁
世人往往力能幹未免目蝦終惚恍緘機僞謬各
臣妾未覩堂堂筆中玉袖間澀縮氣如線淨几明
窗謾瞻仰從來所有萬錢價不卽臭帑當火葬傾

心妙絕豈求勝妄意臨摹須殺謗端居自號書一

品好事如封繪三藏諸郎青出即護持未肯充飢

謬為駟

書史載僻道祖詩云寧
聲動破千金資是也

余衰二物擬高閣

子可專之世無兩書來詩往但悠悠塵土欺人正

惆悵余答云劉郎收画早甚卑折枝花草首徐熙

十年之後始聞道取吾韓戴為神奇邇來白首進

道與學者信有髓與皮始知十襲但遮壁牛馬便

可裹弊帷我我太平老寺主白紗帽首無冠鞋武

士後列肅大劔宮女旁侍顰脩眉神清眸子知寡

欲齒露脣反法定飢世人見服似摩詰不知六朝

居士衣後人勿把亂唐突梁時筆法了可知道子

見之必再拜曹劉何物望藩籬本當第一品天下

却緣顧筆在漣漪時初報余得梁武帝象此象今

在仲忽處

魏泰字道輔有徐熙澄心堂紙画一飛鷄如生智

永真草歸田賦奇物也

范大珪有富公家折枝梨花古筆非江南蜀画
蘇舜欽子美家有畢宏一幅山水奇古題數行云
筆勢凶險是也

王敏甫收李重光四時紙上橫卷花一軸每時則
自寫論物更謝之意文一篇画一幅字亦少時作
花清麗可愛

江南周文矩士女面一如昉衣紋作戰筆此蓋布
文也惟以此爲別昉筆秀潤勻細

沈括存中收唐人壁画兩大軸或一手一面或半
身是學者記其難處遂題爲真

蘇洵及之處收古苜香一枝耆字國老題爲閭令
画寶月所收李成四幅路上一才子騎馬一童隨
清秀如王維画孟浩然作人物不過如是他圖
画人醜怪賭博村野如伶人者皆許道寧專作成
時画

李公麟云海州劉先生收王獻之画符及神一卷

咒小字五斗米道也李伯時只一見求摹不許其子居金陵與王荆公連袂陳元興帥金陵余託訪之云久爲一貴人取去竟不知誰何

蔣永仲收韋侯松一幅千枝萬葉非經歲不成鱗文一一如真筆細圓潤

梅澤有張璪澗底松葛氏物余託購乃自取之

古画至唐初皆生絹至吳生周昉韓幹後來皆以熱湯半熟入粉搥如銀板故作人物精彩入筆今

人收唐画必以絹辨見文麓便云不是唐非也張僧画閭令画世所存者皆生絹南唐画皆麓絹徐熙絹或如布

裝背画不須用絹補破處用之絹新時似好展卷久爲硬絹抵之却於不破處破大可惜古書人惜其字故行間勒作痕其字在筒瓦中不破今人得之却以絹或絹背帖所勒行一時平直良久於字上裂大可惜也紙上書画不可以絹背雖熟絹新

終硬文縷磨書画面上成絹紋蓋取爲骨久之紙
毛是絹所磨也用背紙書画日月損磨墨色在絹
上王晉卿舊亦以絹背書初未信久之取桓温書
看墨色見磨在紙上而絹紋透紙始恨之乃以歛
薄一張蓋而收之其後不用絹也絹素百片必好
画文製各有辨長幅橫卷裂文橫也橫卷直裂裂
文直各隨軸勢裂也直斷不當一縷歲久卷自兩
頭蘇開斷不相合不作毛指則蘇也不可僞作其
僞者快刀直過當縷兩頭依舊生作毛起指又堅
紉也溼染色棲縷間乾薰者烟臭上深下淺古紙
素有一般古香也

劉子禮以五百千買錢樞密家画五百軸不開看
直交過錢氏喜旣交画只一軸盧鴻自画草堂圖
已直百千矣其他常筆固多也

小八分詩句帶筆如行草奇甚今無此體

宗室君發以七百千置閣立本太宗步輦圖以熟

絹通身背画經梅便兩邊脫磨得画面蘇落

文彥博以古画背作匣意在寶惜然貼絹背著綳損愈疾今人屏風俗画一二年卽斷裂恰恰蘇落也匣是收壁画製書画以時卷舒近人手頻自不壞歲久不開者隨軸乾斷裂脆黏補不成也

王球字夔玉有兩漢而下至隋古帝王象云形狀有怪甚者恨未見之此可訪爲祕閣物也

檀香辟溼氣画必用檀軸有益開匣有香而無糊氣又辟蠹也若玉軸以古檀爲身檀身重今却取兩片刻中空合柄軸鑿乃輕輕不損画常卷必用桐杉佳也軸重損絹軸不宜用金銀旣俗且招盜若栢靈寶不然水晶作軸挂幅必兩頭墜性重蜀青圓錢雙鸞錦最俗不可背古画只背今人裝堂亦俗也

蘇木爲軸以石灰湯轉色歲久愈佳又性輕角軸引蟲又開軸多有溼臭氣檀犀同匣共發古香紙

素既古自有古香也

范寬山水業業如恆岱遠山多正面折落有勢晚年用墨太多土石不分本朝自無人出其右溪出深虛水若有聲其作雪山全師世所謂王摩詰王士元山水作漁村浦嶼雪景類江南画王鞏定國收四幅後與王晉卿命爲王右丞矣趙叔益伯充處有摹本

余以范寬圖易僧夢休雪竹一幅巨石倒影下落葉數片浮水上旁一枯木亦倒影後易韋馬于蔣長源凡去十一種物方得蔣後易與王詵今蔡勝道有六幅長丈餘奇甚大屋梁方可挂森森如坐竹下

濮州李文定丞相家画三等上等書名用名印中等書字用字印下等亦用字印押字而已及收鍾王迹甚多未得見

江東漕李孝廣字世美處有鍾王迹嘗於金陵重

背拆下背紙乃硃熟唐人門刺其孫奉世語余如此近官太常遂得見

王與公家書畫用太原欽若圖書品少精者余嘗於蔣氏得此鍍金大印劉巨濟借未還

大年收得南唐集賢院御書印乃墨用于文房書畫者

大年收古絹本橫卷經書畫皆精過于當時西昇經馮京當世託王定國背西昇經其古絹紙背四五分透別裝作一卷

道士牛戩筆墨麓豪縱放亦不俗格固在艾宣惠崇寶覺張經之上也

李甲華亭逸人作逸筆翎毛有意外趣木不佳

范大珪字君錫富鄭公壻同行相國寺以七百金常賣處買得雪圖破碎甚古如世所謂王維者劉伯玉相值笑問買何物因衆中展示伯玉曰此誰筆余曰王維伯玉曰然適行一遭不見豈有所歸

乎余假范人持之良久并范不見翌日去取云已送西京背同行梅子平大怒曰吾證也可理於官豈有此理余笑曰吾故人也因以贈之今二十年矣范卒已十年不知所在

趙叔益收張璪松石一軸李公炤家物已破糜不可重背

葉助字天祐收蜀范瓊畫梁武帝寫誌公圖一幅武帝白冠衣褐晉尚白宋齊梁陳習見不同各以所尚色皆白帽帝首叔季文物如此豈非餘分國位乎顧凱之畫維摩猶白首周木德冕皆尚青仲尼曰吾殷人也生于宋故服章甫之冠此殷制殷水德故尚玄玄端章甫皆黑色也封二王後各行其正朔服其文物也漢火德尚赤用赤幘舜土德尚黃故服黃冠圖宜觸類而長之乃不凡

王通元經書晉宋齊梁陳三有餘意也

江南陳常以飛白筆作樹石有清逸意人物不丁

折枝花亦以逸筆一抹爲枝以色亂點花欲奪造化本朝妙工也鄒極大夫有之

池州匠作秋浦九華峯有清趣師董源

高公繪字君素又有張璪澗底松山上苗山水一軸唐韓幹圖于闐所進黃馬一軸馬翹舉雄傑余感今無此馬故賦云方唐牧之至盛有天骨之超俊勒四十萬之數而隨方以分色焉此馬居其中以爲鎮目星角而電發蹄挽踣以風迅暑隆顛以

孤起耳鳳聳而雙峻翠華建而出步闐闐下而輕噴低駑羣而不嘶橫秋風以獨韻若夫躍溪舒急冒絮征叛直突則建德項繫橫馳則世充領斷皆絕材以比德敢伺蹶以致吝豈肯浪逐首荷之坡蓋當下視八坊之駿高標雄跨而獅子攘寧逸氣下衰而照夜矜穩於是風靡格頽色妙才駘入仗不動終日如坯乃得玉爲銜飾繡作鞍僿棗抹粟豢肉脹筋埋其報德也蓋不如偷盧噬盜策蹇勝

柴鑄黃蝸而吐水画白澤以除災但覺馳垂就節
鼠伏防猜怒雖甚厲馴號斯諧誓俛首以畢世未
伏櫪以興懷嗟乎所謂英風頓盡冗仗高排若不
市駿骨致龍媒如此馬者一旦天子巡朔方升喬
嶽掃四夷之塵較岐陽之獵則飛黃腰褭躡雲追
電何所從而遽來又有唐蜀中画雪山世以爲王
維也劔門關圖雪景五代筆也又有唐画山水雙
短幅徐熙海棠雙幅二軸江南裝堂画富豔有生
意趙叔益亦有一軸

王晉卿收江南画小雪山二軸易余歲餘小木一
筆纏起作枝葉如草書不俗後易書與蘇之友李
伯時云其父所收失去知在晉卿家不知歸余恨
不得易云王維筆非也

余收易元吉逸色筆作蘆如真上一鸛鶴活動晉
卿借去不歸

徐熙風牡丹圖葉幾千餘片花只三朵一在正面

一在右一在衆枝亂葉之背石竅圓潤上有一貓
兒余惡画猫數欲剪去後易研與唐林夫蔣長源
以二十千置黃筓画狸猫顫勃荷甚工

薛紹彭道祖有花下一金盆盆旁鶉鳩謂之金盆
鶉鳩豈是名画可笑又收吳王斫鱸圖江南衣文
金冠右衽紅衫大榻上背擦兩手吳王衣不當右
衽

濟州破朱浮墓有石壁上刻車服人物平生隨品
所乘曰府君作令時車是曲轅駕一馬車輪略離
地上一蓋坐一人三梁冠面與馬尾平對自執綏
馬有翬遮其尾一人御又曰作京兆尹時四馬轅
小曲車差高蓋下坐儀衛多有曰鮮明隊又某隊
隊十人騎馬作一隊內一隊背持鏡多不能紀也
從者皆冠

唐人輒裹蓋禮樂闕則士習賤服以不違俗爲美
余初惑之當俟君子留意者舊言士子國初皆頂

鹿皮冠弁遺制也更無頭巾掠子必帶篋所以裹
帽則必用篋子約髮客至卽言容梳裹乃去皮冠
梳髮角加後以幘頭巾子中篋約髮乃出客去
復如是其後方有絲絹作掠子掠起髮頂帽出入
不敢使尊者見旣歸于門背取下掠子篋約髮訖
乃敢入恐尊者令免帽見之爲大不謹也又其後
方見用紫羅爲無頂頭巾謂之額子猶不敢習庶
人頭巾其後舉人始以紫紗羅爲長頂頭巾坐至
背以別庶人黔首今則士人皆戴庶人花頂頭巾
稍作幅巾逍遙巾額子則爲不敬衣用裹肚勒帛
則爲是近又以半臂軍服被甲上不帶者謂之背
子以爲重禮無則爲無禮不知今之士服大帶拖
紳乃爲禮不帶左衽皆夷服此必有君子制之矣
漢刻從者巾與殷毋追同今頭巾若不作花頂而
四帶兩小者在髮兩差大者坐則此制也禮豈有
他君子制之耳余爲漣水古徐州境每民去巾下

必有鹿楮皮冠此古俗所著良足美也又唐初畫
舉人必鹿皮冠縫掖大袖黃衣短至膝長白裳也
蕭翼御史至越見辯才云著黃衣大袖如山東舉
子用證未軟褱曰襴也李白像鹿皮冠大袖黃袍
服亦其制也

又有麟鳳圖半篆半隸以九字九行爲率云惟永
建元年秋十月饗時山陽太守河內孫君見碑不
合禮掾重造記初瑞象麟鳳其銘辭曰漢威德中
興卽政二年辛酉之節首歷四十青龍起云云三
月季春爰易立碑石順禮典文九九度數萬世常
存又一云天有奇鳥名曰鳳皇時下有德民富國
昌黃龍嘉禾皆不隱藏漢德巍巍永布宣揚天有
奇獸名曰麒麟時下有德安國富民忠臣竭節義
以修身聞愆來善明明我君不知九字九行之數
合何典必有識者麟鳳狀一角直上高如足翹如
惡馬鳳冠高尾長甚可怪也余題曰非篆非科璞

已彫形容振振與蕭蕭曾因忠厚方周德坐想訐
謨覽舜韶漢德已衰還應孽魯邦旣弱不爲妖虛
齋自是驚人玩不勝雄狐逐怒鷗嘉祐中一貴人
使江南攜韓馬一匹行及回渡采石磯風大作三
日不可過欲過又大作於是禱于中元水府廟典
祀也是夕夢神告畱馬當相濟翌日詣廟獻之風
止乃渡至今典于廟中因知天才神不能化天生
是物自然而生自乘秀氣而成才也天不能資神
不能化所以玉樓成必李賀記也

蘇耆少子風神如画目如點漆面如凝脂天男相
画不及有器度好學一旦相國寺遇其兄問安否
曰已不幸吾曰豈神奪之乎君大驚曰一旦夢嫁
其妻而議婚心惡之又一旦夢神迎婚禮因得疾
醫曰不可治翌日卒公非神人也何從知之

有吳中一士大夫好画而裝背以舊古爲辨仍必
以名画記差古人名嘗得一七元題云梁元帝画

也又得一伏羲畫卦象題云史皇畫也問所自答云得于其孫了不知軒轅孫史皇孫也若是史皇孫必於戾園得之其他畫稱是嘗見余家顧凱之維摩更不論筆法便云若如此近世畫甚易得顧侍史曰明日教胡常賣尋兩本後數日果有兩凡俗本卽題曰顧凱之維摩陸探微維摩題顧凱之者無文殊只一身是曾見瓦棺象者也其一有文殊睡師子故曰陸探微曾見甘露陸探微有張目

師子故也此收章得象杜荀鶴之流其兄有鑒別曰舍弟極損終與一日燒了會其先化不然梁元帝又夢秦始皇也士流當以此爲戒其物不必多以百軸之費置一軸好畫不爲費以五環價置一百軸繆畫何用黃卷五經赤軸三史猶有俟于抄錄若如是佛畫止可渡江投水府也

漣漪藍氏收晉畫渾天圖直五尺素畫不作圓勢別作一小圈畫北斗紫極亦易於點閱又列位多

異於常圖余常作天說以究天地日月旁側之形
盈虧之質作成晝夜圖六十本因得究潮候大小
又爲晝夜六十圖所引六經以黜古今百家星曆
之妄說又著潮說以證盧肇皮日休之緣飾釋氏
假佛之詭論將上之御府藏之名山

餘杭刻印五聲音六律十二宮旋相爲君圖極精
微夫五音之聲出於五行自然之理管仲深明其
要著其形似太平之具也作樂之道必自此始沈
隱侯只知四聲求其宮聲不得乃分平聲爲二以
欺後學幾於千年無人辨正愚陋之人從而祖述
作爲字母謹守前說陸德明亦復吳音傳其祖說
故以東冬爲異中鍾爲別以象爲獎以上爲賞因
其吳音以講後學莫之爲正余於是以五方立五
行求五音乃得一聲於孟仲季位因金寄土了然
明白字字調聲五音皆具削去平上去入之號表
以宮商角徵羽之名有聲無形互相假借千歲之

後疑互判清太初漏露神姦鬼祕無所逃形著云
大宋五音正韻用以制律作樂能召太和致太平
藏之名山百世以俟與我同志者不徒爲蒙陋生
設也

鑒閱佛像故事圖有以勸戒爲上其次山水有無
窮之趣尤是烟雲霧景爲佳其次竹木水石其次
花草至於士女翎毛貴遊戲閱不入清玩

李文定孫奉世子孝端字師端收僻稷二鶴唐李
昇著色畫二軸三幅山水舟舫小人物精細兩幅
畫林石岸茅亭溪水數道士閑適人物差大反不
工于小者石岸天成都無筆蹤其三幅峯巒秀拔
山頂蒙茸作遠林巖巒洞穴松林層際木身圓挺
都無筆蹤其二度非歲月不可了一畫人間未見
其如此之細且工雖太密茂林中不虛而種種木
葉古未有倫今固無有與余得于丁氏者無以異
也

維揚張狀元師得家多名畫其姪孫南都倅號字
茂宗處見唐畫嵇康廣陵散松石遠岸奇古所書
故事空民字世未見同品畫真佳作也黃筌六幅
著色山水有江南徐崇嗣桃六幅折枝江南周文
矩士女徐熙鱖魚蟹皆有丁晉公親題印餘畫皆
張狀元及景儉字印李成淡墨如夢霧中石如雲
動多巧少真意范寬勢雖雄傑然深暗如暮夜晦
暝土石不分物象之幽雅品固在李成上

關同麓山工關河之勢峯巒少秀氣

董源峯頂不工絕澗危徑幽磴荒迴率多真意

巨然明潤鬱葱最有爽氣礬頭太多

荆浩善爲雲中山頂四面峻厚

王球夔玉家古帝王像後一年余於畢相孫仲荀
處見白麻紙不裝像云楊褒嘗摹去乃夔玉所購
上有之美印記

趙叔益云線褊條闊指半絲細如綿者作畫帶不

生毛以刀刺標中開絲縷間套挂標後卷卽縛之
又不任画心省損画無摺帶隱痕尋常画多中損
者縛破故也書多腰損亦然略略縛之烏用力
宗室仲儀收古廬山圖一半幾是六朝筆位置寺
基與唐及今不同石不皴林木格高挽舟人色舟
製非近古今所惜不全也

畢仲欽家有荆浩山水一軸

畢仲游家有六軸關同画

王欽臣長子有六幅關同古本特奇董源四幅真
意可愛

刁約家有董源霧景四軸

林虞家有王維六幅雪圖董源八幅李成雪圖

余家收紙本曹不興画如意輪一軸

嘉祐中三人收画楊褒邵必右揚休皆酷好竭力
收後余閱三家画石氏差優楊以四世五公字印
號之無一軸佳者邵印多巧篆字其旁大略標位

高略似江南畫卽題曰徐熙蜀畫星神便題曰閻立本王維韓滉皆可絕倒其孫攜韓滉散牧圖至乃雙幅上驢二十餘枚不及崔白輩絹素染深黃絲文總緊索價四百貫面上左以粉作牌子題曰韓晉公散牧圖不疑家寶其上一印鎮江軍節度使印是油單印者其大四寸許文麓下一印只略有唐印最小又文細諸人共笑其僞久之無人信遂以五十千質與江氏而去因嗟之曰華堂之上清晨一羣驢子嘶咬是何氣象

潁州公庫顧凱之維摩百補是唐杜牧之摹寄潁守本者置在齋龕不攜去精彩照人前後士大夫家所傳無一毫似蓋京西工拙其屏風上山水林木奇古坡岸皴如董源乃知人稱江南蓋自顧以來皆一樣隋唐及南唐至巨然不移至今池州謝氏亦作此體余得隋畫金陵圖於畢相孫亦同此體余因題其顧畫幅上云米芾審定是杜牧之本

仍以撥發司印印之蓋證勾譙刻石妄指爲人易去也余與頴簽善託尋善工摹須切記似凡三寄蠟本無一筆似者或可上之御府乞國工摹賜世間爲千年之傳如唐文皇蘭亭豈非一代盛美真絹色淡雖百破而色明白精神彩色如新惟佛像多經香烟薰損本色

染絹作溼香色棲塵紋間最易辨仍蓋色上作一重古破不直裂須連兩三經不可僞作

薛紹彭家三天女謂之顧凱之實唐初畫

邵必家維摩文殊六朝畫西山十二真君亦其次題爲閻立本

余相國寺中八金得紙桃兩枝綠葉蟲透背二葉著桃上二桃突兀高出紙素徐熙真筆也

錢世京家謝靈運盤足坐像亦奇古

高公繪家古花二枝百破碎無名在徐黃上自余家往

江州張氏收李重光道裝象神骨俱全云是顧宏
中筆

沈括收畢宏畫兩幅一軸上以大青和墨大筆直
抹不皴作柱天高半峰滿八分一幅至向下作斜
鑿開曲欄約峻崖一瀑落下兩大石塞路頭一幅
作一圓平生半腰雲遮下積石數塊一童抱琴由
曲欄轉山去一古木臥奇石奇古沈謫秀日見之
及居潤問之云已易與人竟不再出至今常在夢

寐

畫史 終

宣和畫譜

敘

河出圖洛出書而龜龍之畫始著見於時後世乃
 有蟲鳥之作而龜龍之大體猶未鑿也逮至有虞
 彰施五色而作繪宗彝以是制象因之而漸分至
 周官教國子以六書而其三日象形則書畫之所
 謂同體者尚或有存焉於是將以識魑魅知神姦
 則刻之於鐘鼎將以明禮樂著灋度則揭之於旂

宣和畫譜

序

及古閣

常而繪事之所尙其由始也是則畫雖藝也前聖未嘗忽焉自三代而下其所以誇大勲勞紀敘名實謂竹帛不足以形容盛德之舉則雲臺麟閣之所由作而後之覽觀者亦足以想見其人是則畫之作也善足以觀時惡足以戒其後豈徒爲五色之章以取玩於世也哉今天子廊廟無事承累聖之基緒重熙浹洽玉關沈柝邊燧不煙故得玩心圖書庶幾見善以戒惡見惡以息賢以至多識蟲魚草木之名與夫傳記之所不能書形容之所不能及者因得以周覽焉且譜錄之外不無其人其氣格凡陋有不足爲今日道者因以黜之蓋將有激於來者云耳乃集中祕所藏者晉魏以來名畫凡二百三十一人計六千三百九十六軸析爲十門隨其世次而品第之宣和庚子歲夏至日宣和殿御製

以制度上棟下宇以待風雨而宮室臺榭之參差
民廬邑屋之衆與夫工拙奢儉率見風俗故以宮
室次之天子有道守在四夷或閉關而謝質或貢
琛而通好以雅以南則間用其樂來享來王則不
鄙其人故以番族次之陞降自如不見制畜變化
莫測相忘於江湖翕然有雲霧之從與夫濠梁之
樂故以龍魚次之五嶽之作鎮四瀆之發源油然
作雲沛然下雨怒濤驚湍咫尺萬里與夫雲煙之
慘舒朝夕之顯晦若夫天造地設焉故以山水次
之牛之任重致遠馬之行地無疆與夫炳然之虎
蔚然之豹韓盧之犬東郭之兔雖書傳亦有取焉
故以畜獸次之草木之華實禽鳥之飛鳴動植發
生有不說之成理行不言之四時詩人取之爲比
興諷諭故以花鳥次之架雪凌霜如有特操虛心
高節如有美德裁之以應律呂書之以爲簡冊艸
木之秀無以加此而脫去丹青澹然可尚故以墨

竹次之抱甕灌畦請學為圃養生之道同於日用
飲食而秀實美味可羞之於籩豆薦之於神明故
以蔬果終之凡人之次第則不以品格分特以世
代為後先庶幾披卷者因門而得畫因畫而得人
因人而論世知夫畫譜之所傳非私淑諸人也

總十門分為二十卷

共二百三十一人

計六千三百九十六軸

道釋門 四十九人 一千一百七十九軸

人物門 三十三人 五百五軸

宮室門 四人 七十一軸

番族門 五人 一百三十三軸

龍魚門 八人 一百一十七軸

山水門 四十一人 一千一百八軸

畜獸門 二十七人 百二十四軸

花鳥門 四十六人 一千七百八十六軸

墨竹門

一十二人
一百四十八軸

蔬果門

六人
二十五軸

卷第一

道釋一

三教鍾馗
氏鬼神附

敘論

晉

顧愷之

宋

陸探微

梁

張僧繇

隋

展子虔

董伯仁

唐

閻立德

閻立本

張孝師

范長壽

何長壽

尉遲乙僧

卷第二

道釋二

唐

吳道元

翟琰

楊庭光

盧楞伽

趙德齊

范瓊

常粲

孫位

張南本

辛澄

張素卿

陳若愚

姚思元

卷第三

道釋三

五代

王商

燕筠

支仲元

左禮

朱繇

李昇

杜子瓌

杜覲龜

張元

曹仲元

陸晃

貫休

卷第四

道釋四

宋

孫夢卿

孫知微

句龍爽

陸文通

王齊翰

顧德謙

侯翌

武洞清

韓虬

楊棐

武宗元

徐知常

李德柔

卷第五

人物一

前代帝王
等寫真附

敘論

吳

曹弗興

晉

衛協

謝稚

隋

鄭法士

唐

楊寧

楊昇

張萱

鄭虔

陳閔

周古言

卷第六

人物二

唐

周昉

王拙

韓滉

趙溫其

杜庭睦

吳侁

鍾師紹

五代

趙崑

杜霄

丘文播

丘文曉

阮郜

童氏

卷第七

人物三

宋

周文矩

石恪

李景道

李景遊

顧閔中

顧大中

郝澄

湯子昇

李公麟

楊日言

卷第八

宮室

舟車附

敘論

唐

尹繼昭

五代

胡翼

衛賢

宋

郭忠恕

蕃族

蕃獸附

敘論

唐

胡瓌

胡虔

五代

李贊華

王仁壽

房從真

卷第九

龍魚

水族附

敘論

五代

袁義

僧傳古

宋

克夔

叔儼

董羽

楊暉

宋永錫

劉寀

卷第十

山水一

窠石洲

敘論

唐

李思訓

李昭道

盧鴻

王維

王洽

項容

張詢

畢宏

張璪

荆浩

五代

關仝

杜楷

卷第十一

山水二

宋

董元

李成

范寬

許道寧

陳用志

翟院深

高克明

郭熙

孫可元

趙幹

屈鼎

陸瑾

王士元

燕肅

卷第十二

山水三

宋

朱道

朱迪

王穀

范坦

黃齊

李公年

李時雍

王詵

童貫

劉瑗

梁揆

羅存

馮覲

巨然

日本國

卷第十三

畜獸一

敘論

晉

史道碩

唐

漢王元昌

江都王緒

韋無忝

曹霸

裴寬

韓幹

韋鑿

韋偃

趙博文

戴嵩

戴嶧

李漸

李仲和

張符

卷第十四

畜獸二

五代

羅塞翁

張及之

厲歸真

李靄之

宋

令松

趙邈齷

朱羲

朱瑩

甄慧

王凝

祁序

何尊師

卷第十五

花鳥一

敘論

唐

滕王元嬰

薛稷

邊鸞

于錫

梁廣

蕭悅

刁光

周滉

五代

胡擢

梅行思

郭乾暉

郭乾祐

卷第十六

花鳥二

五代

鍾隱

黃筌

黃居寶

滕昌佑

宋

宗漢

孝穎

仲全

仲儻

士腆

士雷

曹氏

卷第十七

花鳥三

宋

李煜

黃居寀

丘慶餘

徐熙

徐崇嗣

徐崇矩

唐希雅

唐忠祚

卷第十八

花鳥四

宋

趙昌

易元吉

崔白

崔慤

艾宣

丁貺

葛守昌

卷第十九

花鳥五

宋

王曉

劉常

劉永年

吳元瑜

賈祥

樂士宣

李正臣

李仲宣

卷第二十

墨竹

小景附

敘論

五代

李頗

宋

親王頹

令穰

令庇

王氏

李瑋

劉夢松

文同

李時敏

閻士安

梁師閔

夢休

蔬果

藥品草蟲附

敘論

陳

顧野王

五代

唐該

丁謙

宋

郭元方

李延之

僧居寧

宣和畫譜目錄

宣和畫譜卷第一

道釋敘論

志於道據於德依於仁游於藝藝也者雖志道之士所不能忘然特游之而已畫亦藝也進乎妙則不知藝之為道道之為藝此梓慶之削鐻輪扁之斲輪魯人亦有所取焉於是畫道釋像與夫儒冠之風儀使人瞻之仰之其有造形而悟者豈曰小補之哉故道釋門因以三教附焉自晉宋以來還

迄於本朝其以道釋名家者得四十九人晉宋則顧陸梁隋則張展輩蓋一時出乎其類拔乎其萃者矣至於有唐則吳道元遂稱獨步殆將前古無人五代如曹仲元亦駸駸度越前輩至本朝則繪事之工凌轢晉宋間人物如道士李得柔畫神仙得之於氣骨設色之妙一時名重如孫知微輩皆風斯在下然其餘非不善也求之譜系當得其詳姑以著者槩見於此若趙喬高文進輩於道釋亦籍籍知名者然喬學朱繇如婢作夫人舉止羞澀終不似真文進蜀人世俗多以蜀畫為名家是虛得名此譜所以黜之

道釋一

三教鍾馗
氏鬼神附

晉

顧愷之

宋

陸探微

梁

張僧繇

隋

展子虔

董伯仁

唐

閻立德

閻立本

張孝師

范長壽

何長壽

尉遲乙僧

顧愷之字長康小字虎頭晉陵無錫人義熙中爲
 散騎常侍愷之博學有才氣丹青亦造其妙而俗
 傳謂之三絕畫絕癡絕才絕方時爲謝安知名以
 謂自生民以來未之有也愷之每畫人或數年
 不點目睛人問其故荅曰四體妍蚩本亡關於妙
 處傳神寫照正在阿堵中嘗圖裴楷像頰上加三
 毛觀者覺神明殊勝又爲謝鯤像在石巖裏云此
 子宜置在丘壑中欲圖殷仲堪仲堪有目病固辭

愷之曰明府正為眼耳若明點瞳子飛白拂上使
 如輕雲之蔽月豈不美乎仲堪乃從之嘗於瓦官
 寺北殿畫維摩詰將畢欲點眸子乃謂寺僧曰不
 三日觀者所施可得百萬已而果如之杜甫題瓦
 官寺詩云虎頭金粟影者謂此愷之世以謂天材
 傑出獨立無偶妙造精微雖荀衛曹張未足以方
 駕也謝赫以謂蹟不逮意聲過於實豈知愷之者
 惜今罕見其畫蓋愷之深自祕惜如嘗以一厨畫

寄桓溫家而後為溫竊取則愷之之畫所以傳於
 世者宜罕見之也今御府所藏九

淨名居士圖一 三天女美人圖一

夏禹治水圖一 黃初平牧羊圖一

古賢圖一 春龍出蟄圖一

女史箴圖一 斲琴圖一

牧羊圖一

陸探微吳人也善畫事明帝在左右丹青之妙衆

所推稱其名略見於宋書人謂畫有六法自古鮮能足之探微得法爲備窮理盡性事絕言象包前孕後古今獨立真萬代之著龜衡鑑也議者率以顧陸僧繇爲之品第或譬之論書顧陸則鍾張僧繇則逸少也是知書畫同體又曰張得其肉陸得其骨顧得其神言肉則淺言骨則深言神則妙深淺神妙不有間乎探微雖介於二者然撫古今之說若兼有之但得骨則精深可知矣豈非顧在前愈於已則陸當居後獨言陸則可以絕人耶探微平生所畫者多愛圖古聖賢像不爲無意近時米芾喜論畫嘗謂明白易辨者唯顧陸與吳生詎不信夫二子綏洪綏肅以家學傳授作畫亦工不墜素習綽有父風而終不近也張彥遠謂體運道舉風力頓挫一點一拂動筆新奇固自不凡矣然能之而不從事於此故傳世者極少嘗於麻紙畫釋迦像爲時所珍蓋麻紙緩膚飲墨不受推筆亦丹

青家所難宜得譽云洪肅亦紹箕裘見聞習尚往往有不待學而能者名載譜錄而所畫不傳豈非為父兄之所掩乎今御府所藏一十

無量壽佛像一

佛因地圖一

降靈文殊像一

淨名居士像一

托塔天王圖一

北門天王圖一

天王圖一

王獻之像一

五馬圖一

摩利支天菩薩像一

張僧繇吳人也天監中歷官至右將軍吳興太守以丹青馳譽于時方梁武帝以諸王居外每想見其面目即遣僧繇乘傳寫之以歸對之如見其人江陵天皇寺有柏堂僧繇畫盧舍那及孔子像明帝見之怪以孔子參佛氏以問僧繇僧繇對曰他日賴此無恙耳又嘗於金陵安樂寺畫四龍不點目睛謂點即騰驤而去人以謂誕固請點之因為落墨才及二龍果雷電破壁徐視畫已失之矣獨

二龍未點睛者在焉世謂僧繇畫骨氣奇偉規模宏逸六法精備當與顧陸竝馳爭先僧繇畫釋氏為多蓋武帝時崇尚釋氏故僧繇之畫往往從一時之好今御府所藏十有六

佛像一

文殊菩薩像三

大力菩薩像一

維摩菩薩像一

佛十弟子圖一

十六羅漢像一

十高僧圖一

九曜像一

鎮星像一

天王像一

神王像一

掃象圖一

摩利支天菩薩像一

五星二十八宿真形圖一

展子虔歷北齊周隋至隋為朝散大夫而所畫臺閣雖一時如董展不得以窺其妙寫江山遠近之勢尤工故咫尺有千里趣僧琮謂子虔觸物畱情備皆絕妙是能作難寫之狀略與詩人同者也今

御府所藏二十

北極巡海圖二 石勒問道圖一

維摩像一 法華變相圖一

授塿天王圖一 摘瓜圖一

按鷹圖一 故實人物圖二

人馬圖一 人騎圖一

挾彈遊騎圖一 十馬圖一

北齊後主幸晉陽圖六

董展字伯仁汝南人也以才藝稱鄉里號為智海
 官至光祿大夫殿內將軍尤長於畫雖無祖述不
 愧前賢夙德名流見者失色但地處平原而無江
 山之助與戎馬為鄰而無中朝冠冕之儀非其不
 至也蓋風聲地氣之所習爾伯仁與展子虔齊名
 于時然董造其微展得其駿展於董之臺閣則不
 及董於展之車馬則乏所長焉是則董之視展蓋
 亦猶詩家之李杜也展作道經變相尤為世所稱

賞自非畫外有情參靈酌妙入華胥之夢與化人同遊何以臻此今御府所藏一

道經變相圖

閻立德歷官工部尚書父毗在隋以丹青得名與弟立本家學俱造其妙唐貞觀中東蠻謝元淡入朝顏師古奏言管周武時遠國歸款乃集其事爲王會圖今卉服鳥章俱集蠻邸實可圖寫因命立德等圖之其序位之際折旋規矩端簪奉笏之儀

與夫鼻飲頭飛人物詭異之狀莫不備該毫末故李嗣真云大安博陵難兄難弟謂立德立本也今御府所藏九

採芝太上像一 七曜像二

遊行天王圖二 莊生馬知圖一

右軍點翰圖一 沈約湖雁詩意二

閻立本總章元年以司平太常伯拜右相有應務之才與兄立德以善畫齊名立本尤工於形似初

唐太宗與侍臣泛舟春苑池見異鳥容與波上喜見顏色詔坐者賦詩召立本寫焉閣外傳呼畫師閻立本時立本已爲主爵郎中俯伏池左研吮丹粉顧視坐者愧與汗下歸戒其子曰吾少讀書文辭不減儕輩今獨以畫見名遂與厠役等若曹慎毋習然性所好欲罷不能也及爲右相而姜恪以戰功擢左相故時人有左相宣威沙漠右相馳譽丹青之嘲嘗奉詔寫太宗真容後有善畫者傳於

元都觀以鎮九五岡之氣猶可以仰神武之英威也又寫秦府十八學士凌煙閣功臣等悉皆輝映前古時人咸稱其妙嘗作醉道圖或以張僧繇醉僧圖比立本嘗至荊州視僧繇畫曰定虛得名耳明日又往曰猶是近代佳手明日又往曰名下定無虛士坐臥觀之畱宿其下十日不能去是猶歐陽詢之見索靖碑也且立本以閣外傳呼畫師至戒其子弟毋習而張彥遠正以魏明帝起凌雲臺

勅韋誕題榜竊比其事是豈知言也哉且戴安道碎琴不為王門之伶人而阮千里終日應客不倦議者以安道不如千里之達也然漁陽摻搗果可

以辱禰衡耶今御府所藏四十有二

三清像一

元始像二

行化太上像一

傳法太上像一

巖居太上像一

四子太上像一

太上西昇經一

拱極圖一

玉晨道君像一

延壽天尊像一

木紋天尊像一

北帝像一

十二真君像一

維摩像二

孔雀明王像一

觀音感應像一

五星像二

太白像一

房宿像一

十二神符一

宣聖像一

步輦圖一

王右軍真一

竇建德圖一

寫李思摩真一

凌煙閣功臣圖一

魏徵進諫圖一

飛錢驗符圖一

取性圖二

西域圖二

職貢圖二

異國鬪寶圖一

職貢獅子圖一

掃象圖一

紫微北極大帝像一

混元上德皇帝像一

張孝師為驃騎尉善畫嘗死而復生故畫地獄相

為尤工是皆冥游所見非與想像得之者比也吳

道元見其畫因効為地獄變相畫評謂孝師眾制

有功未為盡善而地獄變相群雄推服宜道元之

肯摹倣也然怪力亂神聖人所不語宜孝師以冥

游特紀於畫而不為傳也今御府所藏一

傳法太上像

范長壽不知何許人學張僧繇畫然能知風俗好

尚作田家景候人物皆極其情至於山川形勢屈

曲向背分布遠近各有條理而其間室廬放牧之所在牛羊雞犬齧草飲水動作態度生意具焉人謂可以企及僧繇也當時得名甚著官止司人按尉今御府所藏二

醉道圖一

醉真圖一

何長壽與范長壽同師法故所畫多相類然一源而異派論者次之至於竝駕齊驅得名則均也初何與范俱作醉道圖傳於世好事者以僧繇名之蓋必有能辨之者云今御府所藏二

辰星像一

五嶽真官像一

尉遲乙僧吐火羅國胡人也

唐朝名畫錄作吐火羅國歷代名畫記作

千闥國人父跋質那乙僧貞觀初其國以善畫薦中都

授宿衛官封郡公時人以跋質那為太尉遲乙僧為小尉遲蓋父子皆擅丹青之妙人故以大小尉遲為之別也乙僧嘗於慈惠寺塔前畫千手眼降魔像時號奇蹤然衣冠物像略無中都儀形其用

筆妙處遂與閻立本爲之上下也蓋立本畫外國
妙于前古乙僧畫中國人物一無所聞由是評之
優劣爲之遂分今御府所藏八

彌勒佛像一

佛鋪圖一


佛從像一

外國佛從圖一

大悲像一

明王像二

外國人物圖一



宣和畫譜卷第一

宣和圖譜

十三

汲古閣

